



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakngma :

f Tir Yimym

ig tiryimym@aolima

yt tir yimym

TAPAK 8

US Speaker-i Taiwan tir
ajurura majungtsü: China

BWF rankings: PV Sindhu
top 10 nungi tuguogo



VOL. XX NO. 167 (ADOK 167) DIMAPUR YANGTEPNÜ (THURSDAY) METSÜREMI (MARCH) 30, 2023 ₹ 5.00

Medical/Pharmacy dokanem nung CCTV cameras enoktsü

Dimapur, March 29, 2023 (TYO): Dimapur Police Commissionerate kübok Dimapur/ Chumoukedima/ Niuland District tem nung Drugs and Cosmetics Act 1940 indang Rule 65 indang X mesüra H drugs ayokertemi pei pei Medical/Pharmacy dokanem nung CCTV cameras enoktsü tetuyuba agütsüogo. Dokan kiburtemi ita ka tsüingda CCTV cameras enoktsü

mapang züngzüngtsür aser District Drug Controller Authority/ Child Welfare Police Officer temi mashi mapang ka CCTV indang footage reprangtsü akok, ta Commissioner of Police Dimapur Kevithuto Sophie, IPS-i sangdong ka nung metetdaksü. Medical/Pharmacy dokan kibur kari iba tetuyuba sülen manidakra ozüing tapet agi merenshitsu, ta paisa ashi.

Medziphema nung Highway mapa shitak meinyaker

Dimapur, March 29, 2023 (TYO): Medziphema Town public forum (Medziphema Town Mechü Krotho) aser GB Union Medziphema ajanga Deputy Commissioner, Chümoukedima dang 4 Lane yangluba Contractor anema mapa inyaksü temepishiba kar agütsüogo. 4 lane Highway yangluba nung telatetba kar lir aser contractor temi item sülen anidaktsüla. Medziphema ya jila ka lir aser lendong nungi jenbuttsü atema highway nung lane shitak yanglutsü nungdaker, saka contractor temi lateta aliba inyakyim ama meinyaker, ta MTMK aser GB Union Medziphema-i sangdong ka nung metetdaksü. Gari lenmang achijilen Bus Bays mali aser iba

senzusenbongertem lendongi aitsüsa lir. Ali kiburtem nem temenok agütsüogo aser iba lane yanglutsü atema ROW pillars renemogo saka lendong nungi jenbuttsüba lane meyanglu, ta parnoki ashi. Maneni lenjem tongtiba nung kilentzü ayimdak mali aser iba jagi ki aser lenmang metsümbanger. Ano main town nung tetsüing agi senzürtem jajadak mali aser highway tezülen waiting shed mali ta parnokisa ashi. NH 29 indang Medziphema Town main junction nung tetsüing agi senzürtem atema footbridge (overbridge) ka yanglutsü ta contractor-i nangzükogo saka tang tashi ano meyanglu lir anungji tekaraba nung item mapatem atema inyaksü mepishir, ta parnokisa metetdaksü.

President Murmu-i Assam semdangtsü

Guwahati, March 29, 2023 (Agencies): President Droupadi Murmu-i April 6 nü Assam nung Kaziranga National Park semdangi arutsü. President Murmu-i anogo ananü Kaziranga elephant festival nung adentsü. "Assam-i Adarniya Rashtrapati Draupadi Murmu pelashishia agizüktsü yongar" ta Assam CM Himanta Biswa Sarma-i metetdaksü. President Murmu-i April 6

aser 7 anogotem Kaziranga Elephant Festival nung adentsü. KNP-i kümshia Asian elephants kümzüktsü aser wazüka ayutsü atema iba benjung ayongzüka amonger. Parnok den Forest aser Tourism department temi yariteper. Iba benjungmong nung kidang metsüba Asiatic elephants 100 tema tobur junga renemtsür sentong balala nung shilem agir. Shititemi tsüingsanger, football asayar aser asemteper.

Purana Bazaar nungi Chumoukedima tashi lenmang merüktsü tuyur

Dimapur, March 29, 2023 (TYO): Kohima nung G20 senden nung adentsü atema alima tesem balala nungi teshimtet nübotem April 4 nü Nagaland-i arutsü aser iba sülen gari ajanga Kohima-i atutsü. Ainertemji Dimapur Airport nung arua anenzükba sülen Niathu Resort-i aotsü aser iba sülen Kohima-i atutsü. Iba dak sendakba nung District Administration-i Purana Bazaar nungi Chumoukedima tsüingda aliba yimtsüingtemi pei pei telongtet nung aliba gari lenmangtem merüktsü tetuyuba ka agütsüogo. G20 senden atema April 1, 2023 anepdang 7:00 ako nungi

anepdang 10:00 ako tashi Social Work ka alitsü ta Sovima Village Council-i metetdaksüogo. Sovima Sanitation Committee-i Tetso College aser arogo balala den yaritepa mapa inyaksü aser nisungtemi kioktsü, jana okdokba aser jana bendentsüba bosta bener arutsü mepishir ta Sovima council-i ashi. Ano, Niathu Khel nung Acting GB Gebou Metha-ia Highway tobur jungdaksütsü aser green plants ayutsü osang metetdaksüogo. April 4, 2023 nü SHGs ajanga iba mapa nung yaritepsü aser VLO lennirtemi SHGs züngsemtem nem iba osang sangoktsütsü metetdaksüogo.

Ao Senden-i ULBs & Town Council election atema telemtetba kar agi



Ao Senden-i March 29, 2023 nü ayongba senden nung adenertem agiba noksa angur.

Mokokchung, March 29, 2023 (TYO): Ao Senden-i tanü 'Aor Kilem' Mokokchung nung Nagaland state sorkari ULBs & Town Council election agitsü sangdongba dak sentakba nung rondak senden ka jatepa menogo. Iba senden nung Ao Senden Tongror Luden, Sanen Luden, Landowners' Board Mokokchung Town, All Ward Union Mokokchung Town, All Ward Union Changtongya Town, Tuli Town Ward Union, All Ward Chairman Association Mangkolemba Town-tem nungi ketdangpurtem aser Akhoya, Changtongya, Merangkong, Wamaken, Kangtsüing, Khar aser Longjemdang yimtem nungi putu yimsüsürtem arua shilem agia aden. Iba senden nung tongtibangsa Nagaland sorkari Nagaland nung ULBs & Town Council election agitsü sangdongba aliba onük den

repsema Nagaland Municipal Act dak sentakba onük kar shisalemsatepa liasü. Item onüktem dak ajemdaker tatsü-talang aika jembiteper küleni teloki bangzüing 6 renema ayu. Tanü senden nung adenertemi renemba bangzüing:
1. Naga nübur ola anga-a Nagaland Govt. ajanga Nagaland Municipal Act 2001 (NMA) rangben magitsü (repealed in toto) March 28, 2023 anogo Nagaland Legislative Assembly nung lemtetba atema Ao kini pelaba lemsateper.
2. Nagaland Govt.-i kodang NMA tasen yangludir, Indian constitution Arla 371 (A)-i mela aliba ama, Naga nunger kin ajak sobaliba aser inyakyim wazüka ayutsü atema Tribal Hoho-tem nungi nübu shimoka shisa agitepa yanglushitsu Nagaland Govt.

dangi takhangba zülutsü.
3. Nagaland Govt.-i tarutsü nung iba Act ajanga Naga nunger temeten anema inyaksüsa ajangshira, Ao sünak abener shingäia iba inyakyim nung shilem magitsü.
4. Tarutsü nung Nagaland Govt.-i Naga nunger temeten anema ULBs & Town Council election agitsüsa kümra, Ao litsü nungbo iba election magidaksütsü akangalonga lemteter.
5. Nagaland Govt.-i NMA tasen yanglua magizük tsüingta ULBs & Town Council atema Advisor/Committee/Councilor mesüra yamala mesükba shimrabang, Ao litsü nungbo magizüktsü.
6. ULBs dak sentakba ken o nung Ao sendeni taoba mapang koba temzüing ozüingsa yanglua lemtetem agia lir itemji akangalongshia ayur.

Myanmar Army-i Aung San Suu Kyi'er party anentsür

New Delhi, March 29, 2023 (Agencies): Myanmar Army indang Election commission ajanga Aung San Suu Kyi'er National League for Democracy party anentsüogo. Army ajanga renemba electoral legislation ka kübok NLD register masüba atema anentsü. NLD-i ashikülaka 2020 elections nung takok anguba ajanga February 2021 nung sorkar atsüingdok ta Army-i tiyazü kuli agüja parnok metener. Taküm January ita Myanmar Army-i political party tem dang ita ana tsüingda re-register asütsü

temelaba agütsü. Ajisüaka, electoral legislation tasenba ya Army ajanga elections agitsü atema yangluba lir. Myanmar nung political party 90 aliba nungi 50-i dang re-register asütsü agütsüogo aser Bodbar nungi tenzüker tanüingba political party tem anentsür. Suu Kyi-i 1988 küm National League for Democracy (NLD) tentet aser iba sülen 1990 elections nung takok tulu angu saka iba mapang Army-i sorkar loksatsü. Myanmar nung mitkartemi yimsü süa aruba mapang 2015 aser 2020 nung NLD-i

democracy linük ka akümtsü milen bener toktepa takok tulu nguteta liasü. Myanmar Army-i opposition anema tashiyim agi mapa inyaka arur aser küm aika sülen taoba Member of Parliament ka nem tasüba temerenshi agüja tepsetogo. Myanmar toktsür jena aoba political party lenni aikati pei pei party dang ozüing tasen kübok re-register masütsü ayongzükogo. Külen, Army-i pusema nungitba Union Solidarity and Development Party-ibo re-register süogo.

India nung nisung 2,151 dak Covid-19 putet; Nisung 11,903 anepaludar

New Delhi, Mar 29, 2023 (Agencies): India nung Bodbarnü nisung 2,151 dak Covid-19 putetogo aser iba ya ita pungububa nung nisung teimtiba dak putetba lir. Yaküm October 28, 2023 nü nisung 2,208 dak Covid-19 puteta liasü. Tesüiba anogo ishika India nung nisung 1000 tema dak coronavirus puteta arur aser tang nisung 11,903 anepaludar. Tanü tashi nung nisung 4,47,09,676 dak Covid-19 putetogo, ta Union Health Ministry-i metetdaksü. Maharashtra nung nisung 3,

Karnataka nung 1 aser Kerala nung nisung 3 asüba ajanga Covid-19 ajanga asür 5,30,848 kümogo. Maneni, Covid-19 nungi nisung 4,41,66,925 taneptsü nguogo ta Ministry-isa metetdaksü. India nung Covid agi kanga mejungi kongshiba state tenji - Kerala, Maharashtra aser Gujarat lir. Tang Kerala nung nisung 2,877 aser Maharashtra nung 2,343 anepaludar. Maneni, Gujarat nung nisung 1,976, Karnataka nung 806, Delhi nung 671, Tamil Nadu nung 660 aser Himachal Pradesh nung

nisung 574 anepaludar. March 24, 2023 tashi nung India kübok district 24 nung 10% weekly positivity osang metetdaksü aser kasa mapang district 43 nung 5-10% weekly positivity liasü. Taoba hopta Union Health Secretary Rajesh Bhushan-i linük nung Covid-19 wara atema senden ka jatepa menogo. March 22, 2023 nü Prime Minister Narendra Modi-i senden amendang ashiba osang Bhushan-i lemsatep aser paisa state tem dang kümküma alitsü metetdaksü.

Kohima District Planning & Development Board senden menogo



Deputy Commissioner, Kohima Shanavas C, IAS lenisüba kübok March 29, 2023 nü DPDB senden aliba noksa angur. (Mohima, March 29, 2023)

Dimapur, Metsüremi/March 29 (TYO): Ita shia amenba Kohima District Planning & Development Board senden March ita asoshi DPDB Kohima indang Conference Hall nung Deputy Commissioner, Kohima Shanavas C, IAS lenisüba kübok March 29, 2023 nü mena liasü.

Senden nung Cimorb Public School, Kezo town, Chakhabama aser private school tasen lapoktsüba onüktem jembia liasü.

Officer in-charge ajanga

ashiba agi, school ya 2010 küm lapok aser school nung takdang, furniture aser TLM peria lir. Tesayurtem tajung lir aser tesüiba küm asem tashi kaketshir tema temolung süa liasü, ta lai ashi.

Laisa school ketdangsüba tsütsü sentong kanga junga yanglua inyak aser department-i lateta yuja aliba criteria ajak nung temolung süa lir, ta shia liasü.

Iba senden nung Charity School, Kohima tenung Charity Higher Secondary School,

Kohima ta melentsü aser Class 11 tashi bendenloksü indang onoka benok aser teloki temaba ketdangsür dangi abentsü lemetet.

Iba sülen Deputy Commissioner, Kohima ajanga 2023-2024 atema Village Adoption Committee aser Verification Committee for LADP züngsem tasen shima aliba indanga lemsatepa liasü.

District Sericulture Officer, Kohima ajanga department inyakym lemsatep aser yangji silkworm metsüba aser scheme aliba indang shia liasü.

NSCN/GPRN ketdangsür ka mapa nungi anentsür

Dimapur, Metsüremi/March 29 (TYO): NSCN/GPRN ajanga Toluvi village nungi Y. Atoshe Chishi'er jabaso Unoto Chishi linük tenzükba mapa nungi anentsür, ta sangdong ka ajanga ashi.

Pai application agütsüba

nung ajemdaker pa mapa nungi anentsür, ta Ato Kilonser, NSCN/GPRN indang office nungi totuyuba ka agütsüba nung shia lir.

Linük asoshi pai anibelem mesasai tenzükba Naga nunger puti otsü nung teti

bilemtetsü ta Ato Kilonser-i ashi.

Iba totuyuba agütsüba nü nungi tenzüka anogo tenet tsüngta office nem pa indang 'discharge order' agütsütsü metetdaksür, ta sangdong ajangasa ashi.

Tanü nungi Central Administrative Tribunal indang Circuit Court amentsü

Dimapur, Metsüremi/March 29 (TYO): Nagaland nung aliba Central Government employees aser Central Administrative Tribunal kübok sangdongba organization balala nung employees Nagaland nung posting alirtem aser Nagaland nung legal fraternity züngsemtem dang sangdong ka nung Central Administrative Tribunal, Guwahati Bench indang Circuit Court Sitting ka Gauhati High Court, Kohima Bench indang Court No.4 nung March 30 aser 31, 2023 anogotem amentsü, ta metetdaksü.

Advocates/Parties/Central

Government Civilian Employees/ CAT kübok sangdongba organizations nung inyaker Nagaland nung alirtemi parnok shimba aser 'conditions of service' dak sendakba nung ken o Circuit Sitting nung benoktsü akok.

Sorkar tawabangba kübok Union inyakym dak sendakba nung nübur tenzüksü asoshi shima aliba nisungtem 'recruitment' aser 'conditions of services' dak sendakba mangatetep aser ken o balala bentetsü atema Constitution indang Article 323-A kübok Central Administrative Tribunal ya amenok.

Central Administrative Tribunal amenba nukjidong ya danga court tem khuret ajemdaktsütsü aser CAT kübok awajemba nisungtem timtemba dak sendakba nung tekeraba nung obendang agütsütsü lir.

Central Administrative Tribunal küboki aitdaksütsü asoshi Government of India ajanga mapang shia Administrative Tribunals Act, 1985 indang section 14 (2) kübok Ministries aser Departments of Central Government densema organizations 215 sangdonga arur.



Japfu Christian College, Kigwema, Kohima indang college library atema 78 Bn CRPF ajanga Nagaland University syllabus nung aliba ama BA (Arts Stream) asoshi academic text book 72 alija liasü, koba college nung azüngba kaketshir temi amshitsü. Kaket tem ya Japfu Christian College indang principal aser staff nem Bijender Kumar, 2nd - in-Command, 78 Bn CRPF ajanga March 29, 2023 nü college auditorium nung Civic Action Programme ka ayongzuka yangji amoktsü.

Kohima Press Club ajanga asükhu lemsatep

Dimapur, Metsüremi/March 29 (TYO): Taoba mapang külemi inyak aser züngsem alisang Asür S Daiho Mao kinungtsü Keduozhünuo Metha asüba atema temolung shiranga jashir, ta Kohima Press Club ajanga sangdong ka nung ashi.

Ozü "ani/athi" Keduozhünuo asüba asoshi onok temolung raksaba tepang agi merasateter.

Par tanur aser tasü tait kinungertem den onoki mang ayimer aser asükhu tejashi lemsateper. Asen Tulusang Tsüngremi parnok nem temolung nung anisüngzük agütsütsü ta onoki sarasademtsür. Onokisa asür tanüla teti atem makai anisüngzüksü asoshi sarasademtsür, ta KPC sangdong ajangasa ashi.

IT&C Department nung metetbelaba sentong ka agi

Dimapur, Metsüremi/March 29 (TYO): Department of Information Technology & Communication ajanga Advisor, Information Technology & Communication, Economics & Statistics and Evaluation, Sethrongkyu den metetbelaba sentong ka Directorate of Information Technology & Communication, Kohima indang Conference Hall nung March 29, 2023 nü agia liasü.

Iba sentong nung menden Principal Secretary to Chief Minister, IT&C and Power, Dr K.D. Vizo liasü.

Director IT&C, Er. Tongtiliba Longkumer-i pela agizükba o jembidang Advisor nem takok tenüngsang agütsü aser pa lenisüba kübok Department inyakym balala

nung ajanzüksütsü, ta shia liasü. Department inyakym balala indang osang iba sentong nung tongmelang agi Program Officer, Er. Akumla Aier-i agüja liasü.

Advisor, Sethrongkyu-ia sentong nung ketdangsür aser staff tem ajungshia jembia aser nübu longsoba agi masü saka ketdangsür aser staff temi mapa jeta inyakba ajanga Department tejakleni anitsü ta ashi.

Department ketdangsür aser staff tem nungi amalitep aser teyari nüngdaker aser kasa mapang nia akokba agi yaria department tejakleni anir aotsü, ta Advisor, Sethrongkyu-i ashi.

Iba senden nung Directorate of Information Technology & Communication nungi ketdangsür aser staff tem dena liasü.



Mokokchung town kübok Sangtemla Ward nung Circular Road kanga mejungi raksar nübur timtemba ngua iba kiyong nung alir kibong 8-i rongsen tenlateper lenmang yanglushiba mapang tangokba noksa nung angur. Parnoki yanglushitsüba lenmangji feet 350 shi liasü. Sorkar dak dang meimlai tangateter temi rongsen tsüktepa iba ama mapa tajung inyakba ya alima asoshi tatishitsü tajung ka sayur. Mokokchung, 27th March, 2023.

Longleng nung Poshan Pakhwada 2023 amung

Dimapur, Metsüremi/March 29 (TYO): Poshan Pakhwada benjongmung nung maparen balala teinyakdak aliba nung shilem ka ama Department of Social Welfare, Longleng ajanga ICDS project kübok CDPO Office Longleng nung March 29, 2023 nü cooking aser baby show competition ayongzuka liasü, kong tesemdang tongti ama SDO (C) Longleng, Trongdipa Tongpi Sangtam dena liasü.

Iba sentong nung jembidang Sangtam-i temang anema alitsü asoshi chiyongtsü shidak agütsütsü aser mozü mamshiba chiyongtsü (organic food) nung temolung agütsütsü ayongzuka liasü.

Paisa baby show competition nung takok angur nem sempet agüja liasü, kong mezüngbuba jenjang Baulung Angh, tanabuba jenjang Owlung

S. Phom aser tasembuba jenjang Metmei nungeri nguteta liasü.

Cooking competition nung Longleng kübok wards 11 prong nungi shilem agia liasü, kong Shauli ward mezüngbuba jenjang ngutet, Lempong ward aser Nyengching ward nati tanabuba aser tasembuba jenjang nguteta liasü.

Iba cooking competition nung tetendanger tem ya SDO (C), Trongdipa Tongpi Sangtam; BPM, NSRLM, P. Hamlen aser Area Coordinator NSRLM, Alemla nungertem liasü.

Sentong tenzüka CDPO Longleng, Atsole Khalo-i jembia aser sempet agüja liasü.

Supervisor, L. Shamdok Menlei Phom-i melepzüng o jembia aser sentong nung menden District Co-Ordinator Poshan Abhiyaan, S. Longhong Phom liasü.



New Delhi, March 29, 2023: Bodhbarnü Parliament senden tagidak mapang nung Trinamool Congress (TMC) MP temi Parliament kima 'Save Constitution' ta ozülu amer longkak aitba noksa nung angur.

EC-i AAP nem National Party jenjang agütsütsüla: Sanjay Singh

Bengaluru, March 29

(Agencies): Bodhbarnü AAP-i Election Commission (EC) dang, tangsa AAP nem 'national party' jenjang agütsütsüla aser Karnataka Assembly election mapang nung national party nem agütsüba 'facilities' ajak AAP nem-a agütsütsüla, ta takhangba agütsü.

Bodhbarnep Election Commission-ia, Aam Aadmi Party (AAP) nem national party jenjang agütsütsü atema ECV-i asadangdar, ta metetdakja liasü.

Bengaluru nung osangbenertem senden ka nung jembidang AAP nungi Rajya Sabha MP aser party otongdar, Sanjay Singh-i, "Tanü Election Commission-i Karnataka nung election agütsü atema anogo sangdongogo, ajisüaka onokbo melung masüba kar lir," ta metetdaksü.

AAP ya national party akümsü temsüa lir, kechiyong

yaküm party-i Punjab, Gujarat aser Goa elections nung junga inyaktetogo, ajisüaka tang tashi Election Commission-i AAP nem national party agütsütsü atema telemteba magir, ta pai ashi.

"Delhi aser Punjab na nung AAP sorkar lir aser Goa nunga onok vote shilem 6 den MLA ana lir, ajisüaka Election Commission-i official süa AAP nem national party jenjang magütsür. Gujarat nunga ozü MLA pongu lir; yaküm Gujarat assembly election nung party-i vote shilem 14 ngua liasü," ta AAP lenirisa metetdaksü.

"Class 10 nung azünger kaketshir ka dang, temzüng kübok AAP nem national party jenjang agütsütsüla asü?, ta asüngdang nung 'au' ta langzütsü. Election Commission kechi inyakerar ni memetet," ta pai ashi.

"Ni Election Commission dang tangsa AAP nem national

party jenjang agüjang aser Karnataka assembly election nung national party nem agütsüba facilities ajak AAP nem agüjang ta akhanger," ta pai ashi.

"Party ajak senden ka nung Election Commission-i kü dang, AAP-i mepishiba nung ajemdaker kobi melii telemteba agütsü ta nangzükogo. Iba senden nungji chief election commissioner lia ni, onok nem kodang national party jenjang agütsütsü, ta asüngdanga liasü. Pai, kobi melii telemteba agütsü aser AAP nem national party jenjang agütsütsü ta shiogo," ta Singh-i ashi.

"Election Commission-i parnok sasa telemteba agütsüla. Iba atemaji temepishiba shidi agütsütsü menüngdak, ajisüaka onoki shidi agütsüogo aser tang tashi Election Commission-i telemteba magir," ta paisa shisem.

2021 tashi nung nisung 472 nem tasüba obendang agütsü: Centre

New Delhi, Metsüremi/

March 29 (Agencies): 2021 küm December 31 tashi nung linük tesem balala nung aliba jail nung puoka alir 472 nem tasüba temerenshi obendang agüja liasü, ta Bodhbarnü sorkari Rajya Sabha senden nung metetdaksü.

Rajya Sabha senden nung Union Minister of State for Home, Ajay Kumar Mishra-i, tasüba temerenshi obendang agüja alir nisung 290 bo

temerenshi ajema kümja taküm piyong tepuokdak ayutsü obendang agütsü, ta metetdaksü.

Tasüba temerenshi obendang agüja alir teimtibaji (nisung 67) Uttar Pradesh nung aliba jail balala nung puoka lir; iba sülen kasa temerenshi obendang agüja alir nisung 46 Bihar nung lir, Maharashtra nung 44, Madhya Pradesh nung 39, West Bengal nung 37, Jharkhand nung 31

asir Karnataka nung nisung 27 lir, ta minister-i metetdaksü.

Union minister-isa, tasüba temerenshi ajemja taküm piyong tepuokdak ayutsü obendang agüja alir 290 nungjagi teimtibaji (46) Madhya Pradesh nung aliba jail nung lir, Maharashtra nung 35, Uttar Pradesh nung 32, Bihar nung 30, Karnataka nung 19, West Bengal nung 19 aser Gujarat nung aliba jail nung nisung 18 lir, ta metetdaksü.



March 29, 2023 nü Ramnagar (Uttarakhand) nung mezüngbuba G20 Chief Science Advisers Round Table (CSAR) senden nung tejaokertem adenba noksa nung angur.

EC-i state pezü nung by election agütsü atema anogotem sangdong

New Delhi, March 29

(Agencies): Bodhbarnü Election Commission-i Parliamentary aser Assembly constituencies nung by election agütsü atema anogotem sangdongogo.

May 10 nü Punjab kübok Jalandhar parliamentary constituency nung by election agütsü aser Assembly constituencies- 07-Jharsuguda, Odisha, 395-Chhanbey aser 34-Suar, Uttar Pradesh aser 23-Sohiong, Meghalaya nung assembly by election agütsü.

Item by elections agiba sülen May 13 anogo nung vote zünga election agiba osang sangdongtsü, ta Bodhbarnü New Delhi nung osangbenertem senden ka nung Chief Election Commissioner, Rajiv Kumar-i metetdaksü.

By election agütsü anogo aser vote azüngba anogoji Karnataka nung Assembly elections anogo aser vote azüngba anogo den kasa tenjiteper.

2019 küm tenüng menüksüba ken o ka nung Surat nung court kati Congress

lenir, Rahul Gandhi aitsüba sülen pa Lok Sabha MP nungi anentsüogo, aser iba dak sendakba nung Rahul indang Wayanad parliamentary menden atema by election agütsü asü?, ta asüngdanga langzüdang Chief Election Commissioner-i, "Menden ka azüngtetba sülen by election agütsü atema ita trok agütsür. Temaba court nung temepishiba ken o agütsütsü atema trial court-i anogo 30 agütsüogo, anungji onoki ata-a alitsü," ta metetdaksü.

CEC-i, Karnataka assembly election nung vote agütsütsü temsüa alir crore 5.21 lir aser arrshi küm 100 ser temapur voters 16,976 lir, ta metetdaksü.

"Assembly constituencies 224 lir aser iba nungjagi menden 36 bo SCs aser menden 15 STs atema shiteta yuja lir. State nung voters 5,21,73,579 lir. Arrshi küm 80 ser temapur voters lakh 12.15 lir. Ibaji 2018 küm den medemdangra shilem 32 agi teimba akümba lir. State nung matamabensar voters lakh 5.55 lir," ta paisa metetdaksü.



March 29, 2023 nü Bengaluru nung AAP MP, Sanjay Singh aser Karnataka AAP Tir, Prithvi Reddy nati osangbenertem senden ka nung jembidang tangokba noksa nung angur. Karnataka Assembly elections dak sendakba nung AAP-i osangbenertem sendenji ayongzuka liasü.

BJP MP, Girish Bapat alima nungi pilaogo

Pune, March 29 (Agencies):

Pune nungi BJP Lok Sabha MP, Girish Bapat Bodhbarnü alima nungi pilaogo; pa arrshi küm 73 liasü.

Pa tesüiba küm ka ser tesadang shiranga aru. Pa Deenanath Mangeshkar Hospital nung aliba ICU nung treatment tagidak mapang asü.

Pune BJP unit Tir, Jagdish Mulik-i, "Tanü ya tejashitsü anogo ka lir. BJP lenir tain aser Pune Lok Sabha MP, Girish Bapat-i tanü onok toktsüogo. Pa hospital ka nung temongdak mapang asü. Tesüiba küm ka ser tesadang shi pa treatment agia liasü," ta metetdaksü.

Bapat tasümgang par kidang nikongdang 6:00 ako tashi ayuba sülen aonung 7:00 ako meta Vaikunth crematorium nung tatembangbuba asüpila sentong agiogo.

Bapat ya Kasba Peth assembly constituency nungi ponguben tashi MLA inyaka liasü aser 2019 küm pai Lok Sabha election nung takok ngua

liasü.

Mangyim jashi lemsatepa Maharashtra Deputy Chief Minister, Devendra Fadnavis-i, "Pa asüba ajanga ajemaluba lenir tajung ka onoki akoksaogo. Pa ya tsükchir maliba lenir ka liasü. Pa ajak atema tembar liasü. Tangatetba balala liaka pai ajak den tesendaktep junga ayu. Bapat ya mezüng Pune Municipal Corporation nung inyaka liasü aser Lok Sabha tashi nung züngsem inyakba mapang nung Pune yimti terenlok nung pai tongti shilem agiogo," ta metetdaksü.

Girish Bapat ya mezüng RSS nung liasü aser India nung Emergency mapang ita 18 shi jail nung liasü. 1983 küm mezüng pai yimtenren nung ajemok aser Pune Municipal Corporation (PMC) nung corporator inyaka liasü.

2014-19 nung Maharashtra nung Devendra Fadnavis-i aniba BJP sorkar mapang pa Food & civil supplies Minister inyaka liasü.



TIR YIMYIM YIMOBILEM (EDITORIAL)

DIMAPUR YANGTEPNÜ, METSÜREMI (MARCH) 30, 2022

Govt-i telemtetba shitak agiogo

Nagaland nung küm 20 jakdang temzüng ozüng yanglua yur tang tashi Municipal aser Town council election agia moutetbaji Nagaland nung ozüng yanglurtem asoshi tamakok aser nübertem asoshi takoksa liasü. Aji oda, election agia municipal aser town council magitetbajibo yutsür, küm pungo jakdang iba Urban Local Bodies election magidaksütsü nokdang dang Dimapur nung Naga nunger asangur tajung ana khasetba mang Kohima nung rema lir. Iba kasa küm kasa lendong nung Kohima nung tapayutsüka government kiojen dena mitsü kuma rongdokba takoksa tulu ajuruogo. Item ajakji amadoker tang ano kasa temzüng ozüng nung amendaker ULB election kangshia agitsübaji shisabolutsüka liasü. Ajisüaka, tatar senden nung tatar ajaki mulunga ULB election magii thinena atatsüba dang masü saka tang lateta akaba Nagaland Municipal Act, 2001 ozüng ya meshimeshia agiener tasen kuma yanglutsü latetba telemtetbaji tasak saka shitak ka agiogo. Nagaland nung ULB election magitetba ya nübertemi municipal aser town council maginerba masü saka mezüngyongi Naga nunger sobaliba dak mapettsüsa temzüng ozüng yangluba ajanga atalokogo. Ashi, municipal aser town council jenjangbo agüja ayu saka election agia ketdangsertem meshimba ajanga town nung kibur mali amato mapang talangka arudagi. Atangji, Municipal aser town council mapa reprangtsü asoshi government-i Administrative Officer melentepa yoker, ajisüaka item ketdangsertemji iba tesem nungji telidak purtem masünungji, aiben aikati iba tesem nung nungdakbatem mereprangtetter aser tanga len nungi amongi aruba amai dang bilema monger aoer. Iba ama timtem aser takoksa ajuruba jagi ULB election agia municipal aser town council tentetsübaji kanga rongdak nungdak liasü. Atangji, town shia nung ULB-temji tentetyonga Municipal aser Town Council nung mendenbubai anir züngsemtem jagi pei yimti meima kanga nendaka aser ochishia meinyakra yimti nübertem asoshi temoatsü melen khuretang kumadoktsü. Asenok dak iba ama jakla yimya tamajung keta aliba agi aiben nübertemi lenirtem shima mapa metenzükdangyongi temulung melemer. Item jakla yimya tamajung aser kati ka dak mulung melemtetba shisatsü ajak ya endoker ULB election agia municipal aser town council kumtetsü asoshi tang ya asenok asoshi mapang tajung ka asütsü. Atangji, Nagaland government-ia nübertem anemabo ULB election agitsübaji memulungi liasü saka Supreme Court-i kechisüdirsüaka kasa linük temzüng ozüng kübok alir asünungji, Nagaland nunga May ita tashi nungbosa ULB election agir Municipal aser Town council ajak kumtetsüla ta ozüng agütsüba agi koda masü ULB election agitsü sangdong, ajisüaka Supreme court ozüng dang nungbibo nübertem ola temaba asünungji, Nagaland government-i supreme court ozüng masü nübertem ola angabaji tang aser teti asoshi Naga nungertem asoshi dang masü saka India nung state ajak asoshi tangazükdak aser taniidakdak telemtetba tongtibang ka asütsü. Atangji, government-a aser obendangdakja nübertem asoshi yanglu, anungji tatar senden nung lemtetbaji nübertemi magizüktetra melemtet akümstsü aser obendangdak nungi ozüng agütsübajia mapa kuma meinyaktetsü. Atangji, Nagaland nung ULB malitsü masü alitsü, saka tamasa Nagaland Municipal Act tasen ka yanglumatsü. Atangji, iba ozüng tasenbaji nübertemi memeteti meyanglutsü, anungji nübertem tebilemba shidangtsü asoshi mapang peria agütsütsü. Iba atemaji yimjak nung sangdongtsü. 2001 küm Nagaland Municipal Act yangluba mapang nunga nübertem tebilemba shidangtsü asoshi osang kakat ajanga metetdaksüba bilemtetter, ajisüaka nübertemia junga shilem magi südi aser government nung alirtemia nendaka meinyak südi. Joko, idakji tan ser tangbo nübertemia iba ozüng yangluba nung akok tashi shilem tajung agitsü imlar aser government-ia Naga nunger sobaliba meteta nübertemi aginübatemji angatetsü imlar. ULB akümstsüba nükjidong ya asen yimtitem topur junga renloktsü asoshi lir. Iba sentong ajanga yimti yimdong merüka aser topur junga ayutsüba dang masü saka sadema ayutsü asoshi nübertemia saru agütsütsü aser lendong -timtem majurutsüsa kisüjensüba mapatem nunga pei li nung süaka pei yanglunütsü meyanglui ozüng kübok alitsü bilema Municipal Act yangluba nung senso ajaki shilem tajung agitsü imlar. Iba ozüng tasenba ajanga mapa aika nung yimti nübertem putu tasenba nung aliba shisangtsü aser yimti dang masü saka asenoka 'Smart' kumadoktsü.

OLEMSABANG

TETSÜRLA ASER DRAGON ISRAEL ASER MOJING

~ Süpongnüngsang Longkümer, Darogapathar Dimapur

Aor aser Nagaland nübertem asoshi temulung rongka bilem dang Tsüngrem ou (O) agi jempi nung Tsüngrem tang sarasatema asüngtanger Laishiba JA 12 : 1- 17 tashi nungi lemsatepnür. Idangji kotak nungi temaitsü tuluka adok; tetsür ka anü sübur aser la tetsüng kübok ita lir, aser la kolak nung petinu terana aketba korang ka semer liasü. "Anü sübulaji Israel, ita lirji Kanan adongba küm lir, Petinu teranaji Israel kidong terana La mashisa aser nu amongtsü asoshi nusu ashitsü atua ayimten, Israel kidong nungi Yisu asutsü osang sangoktsür yongyatepba intang ta ashir". Ano kotak nung temaitsü tanga ka adok, ajiang, tekolak tenet aser tezü ter atenba Dragon temerem tulu ka liasü; aser pa kolak nung chuba korang tenet sema liasü. "Irag dang Babilon jaa liasü saka Laishiba nung aliba Babilon ya Rome aser tekolak tenet tetezü Rome meketa aliba tenem tenet Tapu 17: 15 nung tzüma nung mena alila tetezü Rome lima meketbanga tzüyim alibaji Map jagi sayur aser tenem tenetji Rome temeküt nungji angur". Pa tepen agi petinutem asemsü nung ka atsüa arur alima nung tsükdaktsü; Lucefer mapa Aser tanur tasur aliba tetsürlai (Israel)tanurji sule-i Lar chir meyoktsü asoshi iba Dragon la jakdang nokdak (Dragon tetezü Herod chuba ozüng agi Yisu sule-i küm ana teküpok ajak tepseta indokdaktsüba indang) ashir. Iba tetsüri tebor chanu ka shibai merang ajok agi kintem madak yimsü asütsüba lir pa asu; iba tetsürji Tsüngrem aser pa chuba menden dangi aniket. Iba Israel ya Tsüngremi shimtetba kin saka Mojing-i arishijen arishiaka Tsüngrem sentong pa ajanga ataloktsü. Anungji Yisu ajanga La kotaki senmanger ta angatetter. Naga nunger asoshi Ao kin shimtetta Yisu kulisütsü asoshi Aor amshi, saka Aor o Israel na kasabo masü Aor kin mekümtangra Sodom temenen mechi amshiba ama ataloktsü menua malitsü südi ta angatetter. Iba tetsürji anügo meyi ka noklang ana sür roker (küm asem sür tesimal) La mesütsü asoshi, koba arem nung Tsüngremi renema ayuba tesem ka lir, iba aremi Mongzü tashikang nung penür jena ao. Tsüngrem aser Pa chuba menden dangi aniketba jagi angatetter. Alima kintemi Yirusalem makdoktsü jelia tetsürla ji küm asemsür tesimal aniena atatsü südi. (Ayipba aoba mapang) Kotak nung tongpang rara liasü ; Mikeal aser pa kotak tenyartemi Dragon den raratsü ao, saka Mojingi makok nung parnok talidak joko mangu. Ibai küm meyi ka Yisui yimsütsü mapang jilia ataloktsü südi ta angatetter. Kechaser parnoki San shanu zü, aser parnok bei kuli o agi paji kokago. (Mojing akokba) Anungji oh kotak aser nenok idakji alirtem, pelateppang. Saka alima aser tzüyim asoshi ayatai tejashitsü lir, kechaser Mojing nenok dangi aluogo, pa mapang tatsüka tang ta metetta pai kanga ain aiter. Tanü tensa alima ajonga nung Mojingi mapa inyaker, Tenlaki raksatsür Yisu kulisürtem tepsetter, Israel madak Ahab chir Ahaziai chubatsü tenzükdang kibuba jakdang kechi tamajung pai aji inyaker, aser bei tepo aser tetsü Nebat chir Yeroboam lenmang nung jaja, aser Israel nunger a tai penshidaktsü. Pai Baal tenzük aser külem, aser tepoi inyakra ajak agi Israel Tsüngrem kibuba ain adokdaktsü. 1 chuba 22: 51-53 Kibubai ashir aji kü tang nungi talangka piladakjang kechiyong kü Akhüm tsüpurtem asoshi akhümstl aser ni sensamasatsürtem ni hau mezüngshitsü 1 Samuel 2: 30. Nagaland yimsüsüba mendeni anir nüpur ajak iba tiya nung nokdaka lir. Aogo ajak asentenshi akipet akiaka küm pongu atema mesüra election tashi tang. Tetsürla (Israel) jenokba arem nungji longkerak aser iba telong nungji tzü temerük ayimer, iba arem nung akidanga temeshibur jenoka kümzük ta ashir. Iba nungji Mojingi tzü jendi adokdakja tetsürlaji ponga odaktsütsü Peri bei tepang nungi ayong ama tzü adokdaktsü. Saka tetsürla yaria ali i bei tepang lapoka, dragoni yokba ayongtzüji meyoka adok. Tsüngrem tenüng nung ochi shia nokdakertem seplasepshi masürtem Tsüngrem akhüm tsüpurtem kümzüktsüsa, saka tasheyim amshirtemji kenü mapa agi kuli asütsü ta Lai o nungi lemsatepber Tsüngremi moajang Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tennessee nung aliba Khristan school ka nung nisung 6 khaset



March 27, 2023 nü Nashville yimti nung Arogoi lapokba Covenant Presbyterian School amakba sülen tangokba noksa nung angur. Iba lendong nung tanur asem desnema nisung trok asü.

March 29, 2023: Hombarnep (March 27) Tennessee nung aliba Khristan school ka nung tetsür kati tanur asem densema nisung trok khasetogo.

Tennessee kübok Nashville yimti nung aliba Covenant Presbyterian School ya 2001 küm Covenant Presbyterian Arogoi lapokba school lir aser iba school ya American Presbyterian Church den affiliate süa lir.

Injang khaloktsülaji arrshi küm 28, Audrey Hale lir ta jangjaogo, ta Metropolitan Nashville Police Chief, John Drake-i metetdaksü. Hale ya taoba mapang iba school nungji zünga liasü.

Hombar nikongdang Metro Nashville Police Department-i osangbenertem senden ka ayongzüka jembidang otongdar, Don Aaron-i iba tatalokba osang tejangja metetdaksü.

Aaron-i ashiba agi, Hombarnep 10:13 ako nung

ketdangsertem nem iba osangji metetdaksüba sülen anepdang 10:27 ako nung police-i tetsürlaji khaset.

Aaron-i, tetsürla ket nungji assault-type rifle prangpong ana den pistol ka liasü, ta metetdaksüü.

"Laji school tezülen aliba gate ajanga school moapu telungi ait aser school telungi tua injang khaloktsü tenzükba sülen building tanabuba jagi tua maneni injang khaloktsü," ta metetdaksü.

Tennessee Governor, Bill Lee-i social media ajanga, "Ni iba tensa mita reprangdar. Yimlibilema school, Arogo aser Nashville nung alirtem atema sarasademjang," ta metetdakja liasü.

Federal Bureau of Investigation (FBI)-i iba tatalokba bushisüngdangdar.

Iba lendong nung asürtemji arrshi küm 9 ser tekübokpur tanur asem- Evelyn Dieckhaus, Hallie Scruggs

aser William Kinney nung den arrshi küm 61, Cynthia Peak, Katherine Koonce (60) aser Mike Hill (61) nung liasü, ta police department-i metetdaksü.

Covenant School ya Covenant Presbyterian Arogo indang ministry ka lir aser iba school ya Khristan tsüraburtem aser Arogo yariba den külemi tanurtem nem shisaliok agütsüba dang masü saka Tsüngrem O nunga tanurtem junga anitetsü nükjidong nung lapok.

Iba lendong atalokba sülen Khristan lenirtem, pastor tem aser yimtenren lenirtem aikati social media ajanga iba tatalokba sashia aitsüogo.

Nashville nung aliba Christ Presbyterian Arogo nung pastor, Scott Sauls-i tamangertem dang iba lendong nung takoksa angurtem aser parnok kibongtem atema sarasademjang, ta mepishia metetdaksü.



Angh-tem aliba lima, Konyak lima nung Konyaktsürtem rongnung mezüng Tsüngrem mapa nung pei taküm aser kibong ajak bendanga agüja tenzüksü asoshi tan March 26, 2023 anogo nung to Konyak Baptist Bumeinok Bangjum-i Y.Thrangmo Konyak ordain sütsüogo. La ya Konyaktsür rongnung mezüng deacon asütsüsa Mission Center Baptist Church, Mon nung deacon inyaker. Rev.Y.Thrangmo Konyak kinungbo Wb.Mankang ya Mon Theological College nung tesayur lir.

ANOGO ABEN TSÜNGREM DEN

Khristan Tekülem

Mathi 4:1-11

Yihuda nung yimsü nung lenir tulu kati Yihuda nung aser khristantem kasa tekülem nung tajangzük anguba ajitetba ka yamai ashi: "Nisungi Tsüngrem indang bilema malitsü akok, saka Tsüngremi nisung atema kanga bilemetsür". Ibai bushitettsü tatempanba lemangji tekülebaji lir kechiaser tekülebaji taküm aliba lemang ka lir. Tsüngrem tesangwa nung alimaji anguba lemang ka.

Koba yimya nung chichiba Khristan tekülem yimyaji sayur? Putu ajak nung, mapa ana maneni külemi alir. Itemji sayutsüngiba aser oji angashiba, aser Kibuba Benjung agiba. Parnok inyakba yimya balala süaka, ka jembir aser ka mapa agi sayur, saka itemji mapabo kasadang. Anapronglai Khristai alangzükba taochi osangtajung ain aser sentsüwangshi nung sangdonger.

Anungji ozüngji odang lir. "Nai Kibuba ne Tsüngrem külemang". Kechiba? Tekülemji Khristan kija takümi Tsüngrem yimli nung shilem agia adenba lir. O ka nung, yangi asen tekülemji, kotak nung külemba tashi mait ongmedang dang lir.

Itemi shisadangang: Tang nai Tsüngrem mebilemer mesüra shinga mebilemer ta bilemer asü? Iba teblemetsü aneptsü asoshi nai kechi merangdang? Tembarten den jembir asü? Counselors den jembir asü? Tsüngrem den jembitsü koda? Ne taküm nung tekülem nem mapang agüja ali asü mali?

Sarasadem: Kü tanela nok nungi kümzükang, kü taküm azü tashi nungi kümzükang. Molusongzü bang nungi kümzükang; arem nashi pungchi nungi Nai kümzükang.

Telangzüba: Aser tesüneptsüba Tsüngremi nenok tetsüng kübok Satan ajemshitsü.

Samaritan's Purse teloki yipru lendong agi kongshirtem yarir



March 29, 2023: Hokolbar (March 24) aonung yipru mopung tesashi agi Mississippi aser Alabama kongshiba sülen Khristan melungtet telok Samaritan's Purse-i iba lendong agi kongshirtem nem teyari balala agütsüdar.

Iba yipru ajanga mile 100 dak tema nung teraksatsüba tulu liasü aser nisung 26 asü, ta Samaritan's Purse teloki metetdaksü.

Iba yipru ajanga Mississippi nung nisung 25 asü aser Alabama nunga nisung ka asü; iba dak alia ki aser kiojen aika raksatsü, aser tang tashi central Mississippi aser Alabama tesem aika nung electric light makai timtemdar.

Samaritan's Purse teloki nungi U.S. Disaster Relief units

anati tractor trailers nung teyari oset/chiyungtsü balala bener apuso, ta parnoki metetdaksü. Parnoki yangji aliba emergency management aser Arogotem den tongtepratepa teyari agütsüba maparen inyakdar, ta parnokisa metetdaksü.

Samaritan's Purse Tir, Franklin Graham-i Facebook post ka ajanga, "Yasüng yipru ajanga teraksatsübaji tesüngmangtsüka lir. Takoksa angurtem atema onoki sarasademtsür, talisa iba lendong nung asür kibongtem atema sarasademtsür," ta lemsatepa liasü.

Graham-isa Mississippi Governor, Tate Reeves-i sarasademtsü ayongzükba lemsatep.

AO OSHI ANGAZÜKDAK: TANÜ ANGAZÜKTSÜBA OJANG



Pila

(v) senshi, oa adok (leave, depart) * Küm temer onok menungraseta pila.

Pio

(n) tebangküp anatsülen ajur tapok tilaka ajanga mopung aputoka ola adokdaksüba (whistle) * Onok asangur asüdang yimdong nung pio asüa senzüba bilemteter.

OLONG PAITEP # 6471

Grid for crossword puzzle #6471 with numbers 1-18 indicating starting positions.

TIPIEN

- 1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Repranzük - (4)
10. Tasola - (5)
11. S _ _ _ _ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

- 1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. _ _ _ hi - (3)
16. Akümüli nungi pilar - (3)

OLONG PAITEP # 6470 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kiooktsü, 5. Lenti, 7. Tajanzük, 11. teronem, 12. Sempa, 13. Jahaz.

Alokbare Class Nung G.K Agir: Missla: Alima nung tenem talangtibaji kechi, Narolai shiang. Narola: Mount Everest. Missla: Very good, alima nung tzünglu tarutiba state ji koba? Merenba shiang. Merenba: Meghalaya nung lir. Missla: Excellent, nütsüng yongsük, population ta ajaba ya, linük ana Toshibai shiang. Toshiba: India aser China. Missla: Alima nung tesüngjemtiba tesemji kechi, Alokbai shiang. Alokba: Alima nung tesüngjemtiba tesemji Nagaland Lagislative Assembly-a Miss. Missla: Areee, aji shibai ashi? Alokba: Obala nung telok ka sensaksema kazüdang ni jungjunga angaa liasüa, aji na Miss. tangji opposition kata maliba agi tekolakbai kechi shidir par tenemsür teku jagi "Hainii, Hainii" ta taka anaprongla mekanga agizüker akoba, ajita asü nungang terara yangzüka alubaji menaktepjakoba. Missla: Hau süra!! Lilir: WhatsApp

Rahul Gandhi onük atema Assam MLA 3 senden nung medendaktsü

Guwahati, March 29, 2023

(Agencies): Bodbarnü Assam assembly nung Congress lennir Rahul Gandhi anentsüba atema obang meputep adoka raratep.

Assam nung opposition-i Lok Sabha nungi Rahul Gandhi anentsüba indang jembitsü atema adjournment motion ka benok.

Iba onük atema opposition züingsemtemi Assam state assembly nung rongrongtepba sülen Assam speaker Biswajit Daimary-i tanü atema MLA asem senden nung medendaktsü.

Speaker Daimary-i Independent MLA Akhil Gogoi aser Congress MLA tem Kamalakhya Dey Purkayastha o Jakir Hussain Sikdar nunger tanü atema senden nung

medendaktsü.

"Onoki India President dang Constitution nung ajemdaker inyaktsü bangzüng ka yoknür" ta Congress lennir Debabrata Saikia-i ashi.

Rahul Gandhi MP menden nungi anentsüba ya Constitution of India alema lir ta Debabrata Saikia-isa ashi.

"Asenoki yangi oziügren indang onük ka jembir. Yasüng Congress legislature party senden nung tanü rongrongtsü telemtetba agiba ni metetogo" ta Assam chief minister Himanta Biswa Sarma-i ashi.

Assam CM-i iba olen ashiba ajanga Congress MLA temi lungkak ait aser parnok sülen tanga party nungi MLA temia sorkar anema ola adok.

Idangji BJP MLA temia taktang tiyongtsü nung adenshir Rahul Gandhi anema yimyim ayim.

Assembly 15-minute adjournment sülen adenshi aser idangji Assam CM-i opposition ajanga motion benokba atema telangzüba agütsütsü ashi. Ajisüaka, opposition-i ibaji magizük.

Assam CM Sarma-i telangzüba agütsütsü nenshiba ajanga Akhil Gogoi-i taktang tiyongtsü orr placards amer lungkak ait.

Iba jagi Assam speaker Biswajit Daimary-i MLA Akhil Gogoi, MLA Kamalakhya Dey Purkayastha aser MLA Jakir Hussain Sikdar nunger tanü senden nung medendaktsü.

May 10 nü Meghalaya nung by-election agitsü: ECI

Shillong, March 29, 2023

(Agencies): Election Commission-i Meghalaya, Punjab, Odisha aser Uttar Pradesh nung Parliamentary aser Assembly constituency tem indang by-election agitsü anogotem metetdaksüogo.

Meghalaya nung Sohiong assembly constituency indang by-election May 10, 2023 nü agitsü.

February 27 nü Meghalaya assembly election agidang Sohiong A/C nung polling

mesütet kechiyong candidate ka ajungbena asü.

February 20, 2023 nü United Democratic Party (UDP) candidate aser taoba Meghalaya minister HDR Lyngdoh asüba ajanga iba constituency nung polling athitsüsa aküm.

May 13, 2023 nü Sohiong by-election indang votes azüngtsü.

"Punjab nung Jalandhar parliamentary constituency, Odisha nung Jharsuguda, Uttar

Pradesh nung Chhanbey & Suar constituency tem aser Meghalaya Sohiong nung constituency nung May 10 nü by-election agitsü" ta Chief Election Commissioner Rajiv Kumar-i Bodbarnü metetdaksü.

By-election agiba aser votes azüngba anogotem ya Karnataka Assembly elections den kasa lir. ECI-isa tanü May 10, 2023 nü Karnataka Assembly Elections agitsü lemtet.

Assam sorkari department balala nung nisung 42,000 shimoktsü

Guwahati, March 29, 2023

(Agencies): Assam sorkari department balala nung mapa 42,000 nung nisung shimoktsüba lemtetogo.

"Mapa lakh 1 agütsütsü nangzüka ama March 29 nü Grade III & IV Recruitment Commission senden ka menogo" ta CM Himanta Biswa Sarma-i ashi.

"Assam sorkari nübortem nen sorkar mapa lakh 1 agütsütsü atema inyaktsü aser taküm May ita nisung 40,000 tashi aniooktsü" ta state finance minister Ajanta Neog-ia ashi.

Taoba mapang nisung 40,000 tashi mapa nung aniookgo. Tanüngba mapatem nung yakta nisungtem aniooktsü, ta Neog-i ashi.

March 31, 2022 tashi nung sorkar mapa lakh 1 agütsütsü ta BJP-i election nung nangzüka indang Independent MLA Akhil Gogoi-i asüngdangdang Neog-i iba telangzüba agütsü.

"Nisung lakh ka aniooktsü atema maparen tenzüko. Iba recruitment process tembangba sülen shilem lemsar appointments letters agütsütsü" ta laisa metetdaksü.

Sorkari sabang balala nung mapa nung aniookba osang balala agütsür aser nisung karbo mapa balala nung shimoka lir ta Akhil Gogoi-i ashi.

"BJP-i küm ka nung sorkar mapa lakh 1 agütsütsü nangzüka saka parnoki ibaji meinyaktet" ta Rajior Dal president Gogoi-isa shisem.

Külen, CPI(M) MLA Manoranj Talukdar-ia finance minister-i langzüba nung temulung masüba metetdaksü. "BJP-i küm ana tejakdang sorkar aküm saka nangzüka ama meinyaktet" ta Talukdar-i ashi.



Meghalaya nung anogo ananü Eat Right Millet Mela nung Health and Family Welfare Minister, Dr Mazel Ampareen Lyngdoh pelaa agizükba angur. Iba sentong ya Malki Ground Shillong nung Dr Lyngdoh-i lapoktsü aser International Year of Millet 2023 nung shilem ka ama ayonga agi. Eat Right Millet Mela ya Commissionerate of Food Safety, Government of Meghalaya ajanga ayongzük. (Shillong, March 29)

Form No. 3

[See Regulation-15 (1)(a)] / 16(3)

DEBTS RECOVERY TRIBUNAL GUWAHATI

Suwarna Bhawan, House No. 12, New Town Path, Near Hanuman Mandir, G.S. Road, Ulubari, Guwahati-781007 (Assam)

Case No.: OA/438/2022

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.

Exh. No.: 3009

CANARA BANK
VS
MR BILSON KIKONTo,
(1) MR BILSON KIKON
D/W/S/O- Son of Mr M Kikon
Son of Mr M Kikon Resident of M S Big ,Bites Half Nagarjan Dimapur 797112
Dimapur,NAGALAND -797112

(2) SMT ZUBENI HUMTSOE

W O SRI ROBIN YANTHON RESIDENT OF POLICE PROJECT AGRI ROAD DIMAPUR 797112
DIMAPUR,NAGALAND -797112

SUMMONS

WHEREAS, OA/438/2022 was listed before Hon'ble Presiding Officer/Registrar on 15/03/2023.

WHEREAS this Hon'ble Tribunal is pleased to issue summons/ notice on the said Application under section 19(4) of the Act, (OA) filed against you for recovery of debts of Rs. 7002325.31/- (application along with copies of documents etc. annexed).

In accordance with sub-section (4) of section 19 of the Act, you, the defendants are directed as under:-

(i) to show cause within thirty days of the service of summons as to why relief prayed for should not be granted;

(ii) to disclose particulars of properties or assets other than properties and assets specified by the applicant under serial number 3A of the original application;

(iii) you are restrained from dealing with or disposing of secured assets or such other assets and properties disclosed under serial number 3A of the original application, pending hearing and disposal of the application for attachment of properties;

(iv) you shall not transfer by way of sale, lease or otherwise, except in the ordinary course of his business any of the assets over which security interest is created and/ or other assets and properties specified or disclosed under serial number 3A of the original application without the prior approval of the Tribunal;

(v) you shall be liable to account for the sale proceeds realised by sale of secured assets or other assets and properties in the ordinary course of business and deposit such sale proceeds in the account maintained with the bank or financial institutions holding security interest over such assets.

You are also directed to file the written statement with a copy thereof furnished to the applicant and to appear before Registrar on 21/04/2023 at 10:30A.M. failing which the application shall be heard and decided in your absence.

Given under my hand and the seal of this Tribunal on this date:18/03/2023.

Signature of the Officer Authorised to issue summons.

Assistant Registrar
Debts Recovery Tribunal
Guwahati

Note :Strike out whichever is not applicable.

GOVERNMENT OF NAGALAND
NAGALAND STAFF SELECTION BOARD
NAGALAND; KOHIMA

No. NSSB/EXAM-4/14/2023

/////

Dated Kohima, the 29th March 2023

NOTIFICATION

In pursuance of the Board's Advertisement NO.NSSB-1/2022 dated 9th September 2022 and with reference to Notification NO.NSSB/EXAM-4/14/2023 dated 7th March 2023, the Nagaland Staff Selection Board is pleased to allow the candidates bearing the following Roll Numbers (in ascending order) to appear for Viva Voce for the posts under Combined Staff Recruitment Examination 2022 (Group I, II, III & IV) as shown in Annexure V-1.

Details of the selected list maybe accessed from the Board's website at <http://nssb.nagaland.gov.in>.

Selected candidates are directed to strictly follow the "Instructions for Viva Voce under CSRE 2022" available in the website.

SD/- (B. HENOK BUCHEM) NCS
Secretary-cum-Controller of Exams
Nagaland Staff Selection Board.

Sri Lanka nung totzü jenjang ajemtsür

Colombo, Metsüremi/ March 29 (Agencies): Sri Lanka rongsenketzüng kanga mejungi akümba ajanga küm ka tepeyong totzü agi kanga anüngba den jenjang kanga saka akümba sülen tang sorkari toktzü jenjang ajemtsütsü telemtetba agiba sangdongogo.

Minister of Power and Energy, Kanchana Wijesekera-i Bodhbarnü osangbenertem den sensaksemba mapang ashiba agi, petrol aser diesel category balala ayaterem nungi tenzüka shilem 8 aser shilem 26 agi tajemba kümer ayoktsü, ta Associated Press sangdong ka ajanga metetdaksü.

Pai ashiba agi, totzü jenjang ajemtsütsü atema telemtetba agiba ya International Monetary Fund den nangzüktepba nung shilem ka lir aser iba den alima nung totzü jenjang aser production costs dak ajemdaker totzü jenjang ajemtsüogo. (Maneni tapak 8 nung...)

US Speaker-i Taiwan tir ajurura majungtsü: China

Beijing, Metsüremi/March 29 (Agencies): Taiwan Tir Tsai Ing-wen United States ajanga aodang US House of Representatives Speaker Kevin McCarthy-i ajurura sashi-sashia rara nokdaksü, ta China-i amokmeren.

Tsai ya Guatemala aser Belize semdangtsü lia Bodhbarnü iba tekumdangtsü ya sangdong, shibai US nung New York aser California ajanga aotsü lir.

Ketdangtsür nungi yimjak nungbo sangdonga mali saka la anogo ter senzüba tatemi California nung McCarthy ajurutsü imlar.

China-i democracy yimya nung yimsü asüba Taiwan ya par indang litsü ama jembir aser US ketdangtsür dang Tsai majurutsü aiben shia aruogo, kechiaser parnoki la ajuruba ya iba asetkong ya linük balaka akumtsü tejangraba bukumer ama ajiteter.

Taoba küm August ita US House Speaker Nancy Pelosi-i Taipei semdangba mapang Beijing-i Taiwan meketa war games ka inyaka liasü. Tsai bendanglen lia China nungeri mera kar danga agira itemji repranga atatsü, ta Taiwan indang sepaitemi shia lir.

China indang Taiwan Affairs Officer odongtar Zhu Fenglian-i Beijing nung osangbener den jembidang, Tsai US nung anenzüksüba ya la airport mesüra hotel nung anenzüka atatsüba kisüng masü saka US ketdangtsür aser legislator tem ajurutsüba lir, ta ashia.

"Lai US House Speaker McCarthy den ajurutepra, ibaji ano rara mesüba ka asütsü, koba one-China principle nung kanga

mejungi aibelenba alitsü, China indang sovereignty aser territorial integrity dangi timtem bener arutsüba aser Taiwan Strait nung yimjung tesunep samatsüba alitsü," ta lai ashia.

"Onoki ibai kanga sashia anema nokdaker aser onoki meyiper raratsü asoshi mera agitsüsa," ta Zhu-i ashia.

Taiwan tiri yamaji anenzüka senzüba ya tang tasen masü aser China-i Tsai bendang limai aoba ya Taiwan anema mera agitsü asoshi mamshitsüla, ta US-i ashir.

Latin America, Caribbean aser Pacific nung tembar linüktem semdangba mapang Taiwan tiri teti US ajanga aor.

China aser Taiwan ya "one China" nung lir aser China indang province ka ama Taiwan-i linük balala den sendakteptsü temeden mali, ta Beijing-i ashir.

China-i par kibur ama jembiba Taiwan-i sashi-sashia aitsür aser Tsai-i aiben Beijing den jembishinü akatsü ayongzükaka iba asetkong nung aliba nüburtemi dang par tarutsü asoshi telemtetba agitsü ta shia lir.

Taiwan tir ya Latin America leni aodang March 30 nü New York nung Hudson Institute ajanga ayongzüba sentong ka nung Taiwan tiri o jembitsü imlar, aser ano April ita Asia-i meyiba shilang dang California nung aliba Ronald Reagan Presidential Library nunga jembitsü imlar.

2016 küm la tir akumba sülen lai US pezüben semdangogo, aser iba shia lai Republican senators Marco Rubio aser Ted Cruz nunger ajurua liasü.

Russia-i Yars intercontinental ballistic missile drills tenzükogo

Moscow, Metsüremi/March 29 (Agencies): Russia-i Yars intercontinental ballistic missile (ICBM) system aser sepai meyrirjang aika dener exercise tenzükogo, koba Moscow-i par nuclear tashi sayutsü merangba ka amai ajiteter.

"Iba exercise nung ajak agi mitkar 3,000 dak tema aser hadir tejang 300 shi dena lir," ta Russia indang defence ministry ajanga Telegram messaging service nung Bodhbarnü ashia.

Topol system melenba Yars missile system ya Russia indang tashi tulu aliba nok-nü tem rongnung shilem ka kumdaksütsü aser ali nung aliba nuclear arsenal tongti südaksütsü Russia Tir Vladimir Putin-i nükjindong lir.

Iba exercise mapang Yars mobile system yagi Russia nunger region asem nung exercise agitsü, ta ministry ajanga ashia saka region tem tejangja mashi.

"Tongtipang missile-men temi majitetedaksütsüsa aser

aerial reconnaissance tasentem den tokteptsüsa Central Military District aser Aerospace Forces indang unit tem den osangtsüsang agiteptsü," ta ministry ajanga ashia.

Yars mobile ICBM kar yimyatem tejangja meteta lir, koba meta kilometre 12,000 tashi aotsü akoker aser nuclear warheads aika benteter ta ashir.

Iba system nungya 'multiple independently targetable nuclear warheads' abentsü akoker aser truck carriers nunga inokteter aser silos nunga amshiteter, ta military bloggers temi ashir.

Taoba küm February ita nungi Ukraine maka arudang Russia-i par mesü mesüra China aser South Africa ama danga linüktem den külemi military exercise aika agia arur.

Parnoki Belarus nunga military training tali agütsür, koba Russia aser Ukraine den arütsüa lir aser comprehensive drills aika agia arur.

1buba NECDC Interstate Friendship Senior asayamung tenzükogo



Dimapur, Metsüremi/March 29 (TYO): Nagaland Cricket Association-i ayongzuka asayaba 1buba NECDC Interstate Friendship Senior Men's Tournament (limited overs match) March 29 nü tenzükogo. Iba asayamung ya Nagaland Cricket Stadium aser Sovima Cricket Ground nung asayadaki.

Bodhbarnü mezüngbuba asaya Nagaland Cricket Stadium nung Nagaland aser Mizoram na asaya koba Nagaland team-i ayong ayonga koka liasü. Asaya nung Nagaland team nungi asayar Khrievitso Kense-i over 4.2 nung run 3 agütsür wicket 3 agi aser maiden overs 3 ona kanga junga asaya liasü. Pa nem man of the match award agütsü.

Mizoram team atema Joseph Lalthankuma (12 runs) aser Vikash Kumar (17 runs) nati dang tera junga asayateta run ter dak tema yanglua liasü. Mizoram team nungi tanungba asayartemi junga masayatet aser kasa mapang nung Nagaland team bowler temia

ball kanga junga ona mapang shia wicket agi aser Mizoram nunger batsman tem anisüngzuka asayatsü atema maongka magütsü.

Asaya nung Tahmeed Rahman aser Nagaho Chishi natia wicket anana agi aser Hopenkyu Sangtam, Imliwati aser Moakumzuk nungeria wicket kaka agia liasü.

Tanabuba innings nung Nagaland team nungi opener Hem Bahadur Chettri aser Yugandhar Singh napronglai kanga junga asaya tenzük aser tenapronglai run 28 (each) yanglu. Mizoram nunger bowler tem atema defend asütsü asoshi run peria yanglua maliasü aser parnok rongnungi Rinsangzela-i Hem Bahadur out süja liasü.

Hem out asüba sülen Nagaland captain Jonathan Rongsen batting ameni ait aser pai six ka züka Nagaland team-i iba asaya wicket 9 agi koka liasü.

Bodhbarnüsa Sovima Cricket Ground nung Meghalaya aser Arunachal Pradesh na asaya, ajisüaka

ground tai asüba ajanga asaya menorang tenzük aser innings ka nung over 40 dang asaya liasü.

Iba asaya ya Meghalaya-i wicket 8 agi koka liasü.

Mezüng batting amenba sülen Arunachal Pradesh team-i run 49 dang yanglu aser parnok rongnungi Tech Neri-i run (11) timtiba yanglua liasü. Meghalaya team atema Abhishek Kumar-i over 6 nung run 16 agütsür wicket pongu agia liasü. Pai top order 4 out sütsü aser pa nem man of the match award agütsü.

Meghalaya team nungi asayartem rongnungi Arien Bonchang-i run (19) timtiba yanglua parnok asaya ayong ayonga akok.

March 30 nü asayatem:

Mizoram vs Sikkim.

Venue- Sovima Cricket Ground.

Time- 08:45 AM

Manipur vs Arunachal Pradesh.

Venue- Nagaland Cricket Stadium.

Time- 08:45 AM.

Sri Lanka nung totzö ...

Iba ita tetenzüklen IMF-i Sri Lanka nem USD billion 2.9 agütsütsü atema agizüka liasü. Iba ajanga Sri Lanka rongsenketzüng kanga mejungi kümer aliba asüngsashitsü atema teyari agütsütsü. Wara poktetba ajanga tanga tebilemtsü kar aliba ajanga Sri Lanka rongsenketzüng kanga mejungi aküm.

Taoba küm chiyongtsü, mozü aser totzö agi kanga anüngba ajanga nüburtemi yimtung nung longkak ait tenzük aser tir Gotabaya Rajapaksa linük toktsür jena aotsüsa aküm aser mapang nungi anena liasü.

Tanga tatalokba ka nung sorkari United States, Australia aser China nungi company asem nem Sri Lanka nung fuel stations tem achaayangtsü atema license agütsütsü asoshi telemtetba agiba anema nokdakba petroleum industry

trade union temi iba anema longkak aittsü ta amokmerenogo.

Sorkar meyong Ceylon Petroleum Corporation ya shilem ka privatise sütsütsü asoshi sorkari benokba anema union temi nokdaka arudar. Sri Lanka nung Ceylon Petroleum Corporation den tokteperji Indian Oil Corporation dang lir.

Longkak aittsü amokmerenba sülen nüburtem totzö agi anüngtsü tsüba fuel stations tem sünga adenshia liasü.

Wijesekera-i ashiba agi, strike ayongzükaba ajanga tetsükdaktsü karbo adokogo, ajisüaka military-i inyakyim tetsükdaktsü madoki inyaksangshitsü atema teyari agütsüdar. Totzö agi anüngbaji dealer temi totzö jenjang ajemtsü timla nung totzö peria order masüba ajanga dang lir, ta pai ashi.

(Tapak 7 nungi...)

Sorkari linük reserves yanglushitsü aser bendanger sentsüh ao tenzüktsü atema semi-state-meyong company tongtibangtem kar privatise asütsü asoshi sentong yanglur lir.

Iba sentong yangluba ya opposition party kar aser trade union temi anema arudar aser ashiba agi, state resources ayokba ajanga linük tia mejungi akümtsü akok.

Taoba küm Sri Lanka-i bendanger sentsüh USD billion 7 aoa aliba anenadok, koba 2022 küm tashi nungbo aomatsü asoshi liasü. IMF-i teyari agütsüba den Sri Lanka nem sen aputsür alirtemi parnok sentsüh yanglushitsütsü atema mulunga agizükogo.

Tir Ranil Wickremesinghe-i ashiba agi, IMF sentong magizükra Sri Lanka 2029 küm tashi küm ka nung USD billion 6 nungi 7 tsüngda sentsüh aotsüsa akümtsü.

BWF rankings: PV Sindhu top 10 nungi tuguogo

Metsüremi/March 29, 2023 (Agencies): India tsürtem rongnungi nungtugu badminton asayar PV Sindhu, 2016 küm November ita nungi tang tashi nung tang mezüngbuba tetsür kija asaya Badminton World Federation (BWF) rankings top 10 nungi tuguogo.

Sindhu shibai 2016 Rio Olympics nung silver aser Tokyo 2020 Olympics nung bronze medal ngua lir, la jenjang ana asepzüka lua tang 11buba nung lir.

Sindhu 2013 küm August ita mezüngbuba top 10-i ai aser la 2016 küm November ita nungi tetsürtem rongnungi asayar tajungtibatem rongnung züngoksema liasü. Taoba world champion ya 2017 küm April ita tanabuba jenjang tashi tua asayaogo.

Arishi küm 27 tain asayar shiba Commonwealth Games 2022 nung tetsür kija asaya nung gold medal anguba sülen yirur mapang tatsüka masayai liasü, lai taküm junga masayateti arudar.

La tawa South Korean coach Park Tae-sang dena pilaogo aser taküm Malaysian Open aser Indian Open nungi asaya tenzük liasü. Ajisüaka asayamung

anaprongla nung la mezüngbuba round nung tsüka liasü.

La February ita Doha nung Badminton Asia Mixed Team Championship 2023 nung bronze medal anguba India team nung densema liasü. Iba sülen la Thailand Masters, Indonesia Masters aser German Open nung masaya.

Maneni la All England Open 2023 nung asaya ajisüaka junga masayatei mezüngbuba round nung China tsür Zhang Yi Man-i tsükdaktsü aser iba sülen Swiss Open 2023 nunga tanabuba round nung tsükatok.

Tebur kija asaya nung HS Prannoy maneni India nunger teburtem rongnungi jenjang tajungba nung lir. Pa tang tibuba nung lir. Kasa mapang nung Kidambi Srikanth jenjang 12bubai luogo aser Commonwealth Games champion Lakshya Sen 25buba nung lir.

Swiss Open 2023 akokba sülen tebur tarep asayar Satwiksairaj Rankireddy aser Chirag Shetty na maneni trokbuba nung lir. Tetsür tarep asaya nung Gayatri Gopichand aser Treesa Jolly nata 18buba nungi masetshi lir.

IOC tetuyuba ya mezüngmeshi ka lir: Kremlin

Metsüremi/March 29, 2023 (Agencies): International Olympic Committee's guidelines koba ajanga Russia aser Belarus nunger asayartem international tetoktepbala balala nung neutrals ama asayatsü atema temelaba agütsüogo, iba tetuyuba nung mezüngmeshi ken o sendaka lir, ta Kremlin-i Bodhbarnü ashi.

Russia-i taoba küm nungi Ukraine amak tenzükba sülen Russia aser Belarus (Moscow nem teyari agütsür) nungi asayartem international asayamungtem nung shilem magitsü atema tenokdangba agüja liasü, ajisüaka IOC-i Mongolbarnü sangdongba guidelines ajanga parnok tanem tanemi asayamungtem nung shilem agitsü atema lenmang lapoktsüogo.

Iba guideline agütsüba ajanga Russia nunger ketdangsurtem kanga mepelar aser parnoki ashiba agi, asayartem nem par linük t e m a i t s ü t e m mamshidaktsütsüsa jenjang agiba ya mezüngmeshia ka lir.

"Iba amala tetuyuba dak mezüngmeshiba sendaka lir, koba agizüktsü makoktsü," ta Kremlin otongdar Dmitry Peskov-i osangbenertem dang ashi.

"Onoki maneni takokba tashi asayartem tejangraba kümzuka

ayutsü atema inyakttsü," ta otongdar-isa shisem.

IOC tir Thomas Bach-i Mongolbarnü ashiba agi, Russia aser Belarus nunger asayartem neutrals ama toktepdaktsütsü asoshi telemtetba ya international sports federation temi agitsü. Neutrals ama toktepbala tetezú asayartemi linük wako aser naklo ken mamshitetsü.

Guidelines nung Russia aser Belarus nunger asayartem team tetoktepbala nung shilem magitetsü aser drugs testing record bena alitsüla. Kasa mapang nung asayar shirnoki rara puesmer mesüra shirnok linük military mesüra national security agency tenüng nung asayar, parnoki asayamungtem nung shilem magitetsü, ta shia lir.

IOC executive board-i tetuyuba agütsüba ya asayartem international tetoktepbatem nung shilem agidaktsütsü atema lir, ajisüaka 2024 Paris Olympics atema mejeta telemtetba agiba ka masü aser iba asayamung atema yabo tanga mapang ka nung telemtetba agitsü.

Ukraine aser parnok pusemertemi kari Russia aser Belarus nunger asayartem neutrals ama asüyonga asayadaktsüra parnoki shilem magitsü, ta shiogo.

BILEMDANGANG

"Amang nung alidang tesangwa ka lir ta kodanga tamadok."